

sal voleno restauro, parlò el suo avvocato, rimessa a diman aldir la risposta.

Da Corfù, dil rezimento, fo lettere di 3 Marzo. Mandano el capitulo dil capitano di la Parga, za hauto le zente dil Turco è a ordine, aspelano comandamento dil Signor per Hongaria, poi in Austria, de qui se cava el contraffisso da terra, et se fa uno repostò a la muraia maistra et preparar etc., li è andà gran spesa, hanno intacado la Camera, però se mandì danari, et per dar do page a questi fanti.

Vene in questa matina in Collegio l'orator Cesareo per cose particular.

308 *A di 19,* fo San Joseph. Se varda per la tera, nè officii sentano, non fu alcuna lettera, et la Signoria deteno audientia a li Vituri per l'abatia di Leno per la differentia hanno con domino da Martinengo, al qual el cardinal de Monte renunciò ditta abatia, et vol el possesso, et questi Vituri vol la pension, iusta la promission fu fata *alias* in Collegio per nome dil ditto cardinal.

Fo grandissimo fredo, pioza et neve agiazada quasi tuto el zorno.

Da Bergamo, di Rectori, di . . . Come li capitani mandono a tuor li 4 pezi nostri de artellaria, fono prestadi al castelan de Mus, et erano in . . . haveano hanti di quelli la consignation etc.

Da poi disnar, fo Collegio et la Signoria per compir de aldir l'avvocato fiscal nostro zerca quel da Rovare et altri daziari dil sal de Trevixo, voleno restoro, si che stetenò su questo occupadi.

A di 20, la matina. Non fu alcuna lettera, ni vene in Collegio alcun orator.

In Quarantia Criminal fo il terzo Conseio, vene sier Polo Nani el consier in luogo di sier Hironimo Loredan è morto, per expedir la retention di sier Hironimo Celsi fo podestà a Budoa. Parlò un poco sier Andrea Barbarigo sindaco in Dalmatia, qual solo vien in questo caxo, *licet* il colega formò el processo; li rispose sier Zacaria Trivixan el XL poche parole. Andò la retention: 8 non sinceri, 9 de sì et 21 di no, et fu preso de no.

Da poi disnar, fo Conseio di X semplice et fato vicecao in loco di sier Andrea Vendramin, se risente, sier Nicolò de Prioli. Fo leto li processi di do monetari, Zuan Manenti et Agustin . . . , et per l'ora tarda volendo parlar l'avogador fo rimesso a doman.

Item, leto una gratia de sier Beneto Zulian, Bernardo Navaier et Piero Morexini rimasti savi ai Ordeni et non hanno la età de anni 25, et voleno

per gratia poter intrar, come fu fato a sier Marco Foscolo, et leto la parte secreta, non vol se daga p^{ma}ova ai Savi ai Ordeni se non harano compiti anni 30, ni per danari ni per altra pruova, si non per parte posta per il Serenissimo, 6 Consieri et 3 Cai di X et presa con li cinque sestì di le balote, fo presa dil 1523; et questa gratia data al Foscolo par fosse messa per 3 Cai di X soli: hor bisognava far un viceconsier in loco di sier Pandolfo Morexini, è cazado, l'ora era tarda, niente fu fato.

In questa matina, vene in Collegio l'orator de Franza per saper de novo.

In Quarantia Criminal, li Avogadori volseno meter parte de suspender el squartar che se dia far de quel . . . caleger da Chioza, come fu preso, qual vol sia confinà a morir in prexon. È acusado de do deliti, uno che fu amazà uno suo fio et li soterà, l'altro caso seguito in

Parlò per farli la gratia sier Giacomo da Canal avogador, li rispose sier Zacaria Trivixan el XL non se dia far, poi parlò sier Piero Mozenigo avogador. Andò la parte: 4 non sinceri, 10 di la parte, 23 di no, et fu preso de no.

In questo zorno fo sepolto a San Zanepolo sier Hironimo Loredan fo capitano a Padoa, fo dil Serenissimo, dovea intrar al primo de april consier de Venetia, morto con optima fama, de ydropisia, li fo fato bellissimo exequie, el capitolo di la contrà, 6 congregation di preti, capitolo di Castelo et di San Marco, 24 jesuati con li torzi, 24 marinari et 300 et più batudi di la scuola de la Misericordia, ai qual fo dato per elemosina un marzelo d'arzenzo per uno. Fu posto in deposito, dove è do altri fratelli, sier Alvise et sier Bernardo a l'altar grando, et il Serenissimo è in alto, dove voleno far una arca da principe.

Noto. Intesi in questi zorni a Lio esser trovà una zara cavà di sotto terra dove se pruova le bombarde, et alcuni guastadori che lavora per quelli sora le Aque, cavando per tuor alcune piere, vien dito trovò questa zara piena de ducati, *unde* per li Proveditori sora le Aque fo scritto in Friul, questi 5 cavano li sono de Friul et è partiti, siano retenuti per saper la verità etc.

Noto. Per il Collegio . . . aldir le opinion di medici, zerca el far dil mitridate, fono deputati sier Daniel Renier, sier Marco Minio, sier Sebastian Foscarini dottor, sier Gasparo Contarini et sier Lorenzo Bragadin, et da una parte è domino Marin Brocardo et Valerio Superehio, da l'altra Vetur Tricavilla et Donado di Mati.